

見

聞

雜

紀

見聞雜紀卷之七

吳興

李樂彥和述著
朱國禎文寧校正

本朝開基

聖聖相傳之年分

洪武元年

甲戌

三十一年

甲戌止

建文元年

乙卯

四年

壬午止

永樂元年

癸未

二十二年

甲辰止

洪熙元年

乙巳

止

宣德元年

丙午

十年

乙卯止

宋 宗 景
宋 仁 景
宋 理 景
宋 長 景

宋 考

一

新 統

格

嘉 泰 康 永 隆 慶 嘉 靖 正 德 萬 曆

嘉 泰 康 永 隆 慶 嘉 靖 正 德 萬 曆

身圖新統

一

正統元年

丙辰

十四年

己巳止

景泰元年

庚午

七年

丙子止

天順元年

丁丑

八年

甲申止

成化元年

乙酉

二十三年

未丁止

弘治元年

戊申

十八年

乙丑止

正德元年

丙辰

十六年

辛巳止

嘉靖元年

壬午

四十五年

丙寅止

隆慶元年

丁卯

六年

壬申止

萬曆元年

癸酉

二

唐岑嘉州參送張升卿宰新淦

官柳葉尚小長安春未濃
送君潯陽宰把酒青門鐘
水驛楚雲冷山城江樹重
遙知南湖上祇對香爐峰

三

五臟之神肝蒐肺魄心神腎精脾意若人恬
淡則神定魂清意安魄寧精不走失若人躁
競則神疲魂濁意亂魄散精遂潰耗。張無
垢曰快意事孰不喜為徃徃事過則悔者以
他人有甚不快存焉豈得不動於心君子所

以隱忍詳復而不輕為 王肅家誠曰凡為

主人飲客使有酒色而已無使至醉若為人

所強必退席長跪稱父命以辭之敬仲辭君

而况於人乎 墨子曰輕譽苟毀好憎尚怒

小人哉 唐李文公問藥山禪師曰如何是

黑風吹船飄落鬼國師曰李翱小子問此何

為文公怫然怒形於色師笑曰發此嗔恚便

是黑風吹船飄鬼國也 薛文清公讀書錄

云促迫褊窄淺率浮燥非有德之氣象 王

文成公曰眼前路境須令放開若太逼窄非

惟人不能近恐在己亦無措足之地。程叔
子曰精神道德言動一切以收斂為主發散
是不得已天地人物皆然。王龍舒勸戒文
喜怒好惡嗜慾皆情也養情為惡縱情為賊
折情為善滅情為聖。以上述烏程唐守禮
吏隱堂日鐫

三

善則疑之聞人惡則信之此滿腔殺機
也。士君子盡心利濟使海內人少他不得
則天亦自然少他不得即此便是立命。官

情太濃歸時過不得生趣太濃死時過不得甚矣有味於淡也 一念之善吉神隨之一念之惡厲鬼隨之知此可以役使鬼神 大約評論古今人物不可便輕責人以死 治國家有二言曰忙時閒做閒時忙做變氣質有二言曰生處漸熟熟處漸生 看中人看其大處不走作看豪傑看其小處不滲漏 甌甌子每教人養喜神止庵子每教人去殺機是二言吾之師也 奢者不特用度過侈之謂凡多視多聽多言多動皆是暴殄天物

任事者當置身利害之外建言者當設身利害之中此二語其宰相臺諫之藥石乎
乘舟而遇逆風見揚帆者不無妬念彼自處順于我何關我自處逆于彼何與究意思之都是自生煩惱天下事大率類此 出一箇喪元氣進士不若出一箇積陰德平民。救荒不患無奇策只患無真心真心即奇策也。吾不知所謂善但使人感者即善也吾不知所謂惡但使人恨者即惡也 青天白日
和風慶雲不特人多喜色即鳥鵲且有好音

若暴風怒雨疾雷閃電鳥亦投林人亦閉戶
乖戾之感至于此乎故君子以太和元氣為主
吳俗坐定輒問新聞此游閒小人入門
之漸而是非媒孽交構之端也地方無新聞
可說此便是好風俗好世界蓋訛言之訛字
化其言而為訛也 天下容有曲謹之小人
必無放肆之君子 人有好為清態而反濁
者有好為富態而反貧者有好為文態而反
俗者有好為高態而反卑者有好為淡態而
反濃者有好為古態而反今者有好為奇態

而反平者吾以為不如混沌為佳 偶談司
馬溫公資治通鑑且無論公之人品政事只
此間工夫何處得來所謂君子樂得其道故
老而不為疲也亦只為精神不在嗜好上分
去耳。俗語近于市纖語近于娼諢語近于
優士君子一涉此不獨損威亦難迓福 羅
仲素云子弑父臣弑君只是見君父有不是
處耳若一味見人不是則兄弟朋友妻子以
及于童僕雞犬到處可憎終日落嗔火坑墮
中如何得出頭地故云每事自反真一帖清

涼散也。欲見古人氣象，須于自己胸中潔淨時觀之。故云見黃叔度使人鄙吝盡消，又云見魯仲連、李太白使人不敢言名利事。此二者亦須于自家體貼。夫衣食之源本廣，而人每營營苟苟以狹其生，逍遙之路甚長，而人每波波急急以促其死。士君子不能陶鎔人，畢竟學問中火力未透。後輩輕薄前輩者，往往促筭。何者？彼既賤老天，豈以賤者贈之？人生一日，或聞一善言，見一善行，行一善事，此日方不虛生。得意而喜，失意

而怒便被順逆差遣何人作得主馬牛為人
穿着鼻孔要行則行要止則止不知世上一
切差遣得我者皆是穿我鼻孔者也自朝至
暮自少至老其不為馬牛者幾何哀哉 只
說自家是者其心粗而氣浮也 士大夫不
貪官不受錢一無所利濟以及人畢竟非天
生聖賢之意蓋潔己好修德也濟人利物功
也有德而無功可乎。嗜異物者必得異病
挾恠性者必得恠證習陰謀者必得陰禍作
奇態者必得奇窮 待富貴人不難有禮而

難有體待貧賤人不難有息而又難有禮

閉門即是深山讀書隨處淨土 以上述華

亭陳繼儒著

五

唐一菴先生樞曰自古建都多大河南北雍

豫幽冀之間雖欲居高以臨下而察盛衰以

乘天運則智者與造化俱伏羲神農都陳黃

帝都涿少昊都曲阜顓頊都濮帝嚳都亳堯

都平陽舜都蒲坂夏都安邑殷都亳周都長

安秦都咸陽漢都長安晉都洛六朝都建康

唐都長安五代都汴元都燕說者謂豪傑觀天下之勢爭相據重戰而圖得之然而所以覩其勢豈必襲故見而無所通乎故人事之交值睽依闔塞造化顯呈於情境之間有不容於去而取者而習治既延地絕脉水化味又復不甚宜人况衝車所攻矢石所集積骸洒血莽為荆榛斷垣壞壁鬼燐滅沒盖有徙道朱朴云去已衰之衰就未王而王不可謂非論天下之勢圜變而無定在吾有以識之北畿防禦之勢山西行都司當其衝萬全

都司護其背大寧都司藏其備薊州守備斷其徑萬全都司一衛一所嵌山西行都司之境瞭遠之道也大寧都司五衛一所嵌薊州守備之境夾持之法也 都金陵者守淮以防外庭守武昌九江以蔽上游守淮之勢東固淮安泗州自丹陽而揚州而淮安而泗州乃全淮之右臂也西固鳳陽壽州自采石而和州而鳳陽而壽州乃全淮之左臂也東無淮安雖得泗州而不為用西無鳳陽雖得合肥而不為用上游之勢沅湘諸水合洞庭之

波而輸之江則武昌為之都會故湖廣省所以蔽九江江西諸水與鄱陽之浸滙於湓口則九江為之都會故九江所以接武昌而蔽金陵若用於天下則徐邳臨清淮安之應也洛陽釣鄭鳳陽之應也荊州武昌之應也而襄陽又荊州之應也固荊州可以開蜀道固襄陽可以控川陝固臨清可以通燕冀固洛陽可以制潼關其西南守江西以運百粵其東南守浙江以治閩吳皆金陵之門庭帑藏云爾。儀真舊設臨江諸閘後新設攔江閘

於江口引潮水以濟諸閘且便停泊瓜州近
設瓜口閘於西江觜諸壩之利也亦攔江遺
意瓜州舊有通江閘後尋廢瓜洲既設似與
儀真不異關通江與十壩並發不亦可乎裏
河運船十年一造江南船五年一造以往回
越壩耳 國初定鼎金陵以真定之恒山為
北嶽後遷都北平則真定在其南復以山西
渾源州之恒山為北嶽 南方蠱毒有數種
蛇毒蜥蜴毒蠅娘毒草毒食之變亂元氣心
腹絞痛或吐逆不定面目青黃十指俱黑驗

蓋法吐於水沉而不浮含黑豆脹爛脫皮嚼之不腥嚼白礬味甘皆是治蠱法飲白水牛血立效王氏博濟方歸魂散必用方雄硃丸皆可。海鹽海塘連年葺治之費雖天關下義等處擊衝勢烈要亦人事未至攬胥利於創工董吏便於自逸乃故踈其謀工無永遠有以也石塘在外所以防潮勢土塘在內所以固滲漏二者皆不可無其間土塘受惠病於石塘先隳石塘之隳病於土築樁淺又病竈夫引潮以便抱甕所以不久成害即如

清河砌閘土民利行舟停滯欲便經營之利
私賂工師作為衝械無襄陽則荊州不足
以用武無漢中則巴蜀不能以存險無關中
則河南不能以豫居無巴蜀則吳楚不能以
奠枕山東東三府隙地甚多皆可耕之區
人事不修溝澮不立一雨成漫而旱則赤地
千里雖古河額俱堙元虞集之議至今可行
山東平度州東南境有南北新河元時所
開以避海運放洋之險其水源發高密至膠
州分流為南北新河自膠州入新河二百四

十里至萊州之海倉口入海自迤北新河店
置閘以達安東止八十里可通海歲久盡塞
近王副使獻方御史遠宜力主開復并於馬
家濠鑿山麓通海人溺便安不遂此議不可
終已也 海運憚文登南之成山登州北之
沙門此兩險多磧又成山突出當東洋之衝
沙門旋扼處北洋之腹宜無靖勢新河一開
可避兩險不爾則古濰水及沽尤河稍致力
皆可免於兩險。太湖介蘇常湖三府之中
北納荆溪百瀆南納霽溪七十二淩荆溪百

瀆上受金溧常廣諸水東埧既立宣徽應天
之水皆出大江雪溪七十二淩港口日淤若
川勢濟嘉興分以東洩湖之所瀦自吳江長
橋出合龐山湖以南入海為松江自大姚分
支過澱山湖以東入海為東江自鮎魚口北
經蘇郡之婁門東北入海為婁江又有胥口
白洋灣鮎魚口三支流惟吳江長橋築而交
生沙壅松江之勢緩惟大石趙屯等浦淤而
澱山水阻東江之勢緩惟七。鹽鐵等塘滯
而陽城水阻婁江之勢緩近來三支流盛瀉

白茅港北入於大江以達海而白茅港亦易淤淺震澤注海三江松江一流已久為淤上海之南踰浦口即吳淞江嘉定之劉家港即婁江常熟之白茅港乃震澤餘流向北注之揚子江者水勢東南為順今盛流白茅港漸涸於北則長橋所為害其明驗也故陽城昆承流壅漫浚吳淞江南北兩岸定安諸浦間道北注劉家白茅二港又大黃浦流壅傍浚范家浜間道注踰口皆引水北流以順其勢而三吳勢占水利日盛莫知于何底止也。

江勢至京口頗下丹陽一帶運河每患淺練湖高堰欲厚所瀦而時洩之可濟緩急黃河自蘭州入中國五千餘里至開封長石為患決溢惟開封大名居多二府地夷斥孟津而下無山岡東隘且土疏善崩又下流所受已多旁無滯瀦而河身易淤冬春止丈許其湍駛不能遏固勢也古黃河周定王五年徙於礫始失故道漢而下徙決無常漢武帝時已通淮泗宋太宗時始入淮自是南北交注今河水全達淮入海一道自開封蘭陽縣趙

皮寨口東南流由杞縣睢州寧陵歸德夏邑
宿州下符離橋出宿遷縣小河口至清河縣
入淮乃嘉靖七年新開趙皮寨口今盛流一
道自趙皮寨口至寧陵縣南入渦河經亳州
蒙城懷遠縣出荆山口之西開趙皮寨口今
由焉一道自儀封縣北折經黃陵岡蔡冢口
縷水堤入梁靖口出徐州小浮橋下清河縣
入淮其梁靖之行自宋初今流漸微梁靖以
上至儀封北乃黃河東行舊道此三流之南
又正統十三年徙開封西北滎澤縣孫家渡

口入汴河至壽州入淮弘治二年塞三流之
北又新開榆林集口經虞城縣碭山縣四口
衝出蕭縣出小浮橋今塞又正德四年決曹
縣單縣直衝沛縣出飛雲橋今塞又嘉靖九
年決單縣東北流衝出穀亭運河今塞又弘
治二年決荊隆黃陵岡口經曹州濮州出張
秋運河今塞 河南防河堤湖廣防江堤南
直浙江防海堤一決而魚其人今日之事土
勢岌岌人力詭詭 海運三道初元伯顏建
議自上海劉家港入海經揚州海門黃連沙

頭萬里長灘開洋沿山嶼而行抵鹽城縣歷
西海州東海縣密州膠州放靈山洋投東北
路多淺沙行月餘抵成山計水程至楊村馬
頭一萬三千三百五十里至元二十九年朱
清等陳便道自劉家港開洋至撐腳沙轉沙
嘴至三沙洋子江過匾擔沙大洪又過萬里
長灘血沙放大洋清水洋黑水洋至成山過
劉島至芝罘沙門二島放萊州大洋抵界河
口其道差徑至正十三年千戶殷明畧又開
新道劉家港入海至崇明州三沙放洋向東

行入黑水大洋取成山轉西至劉家島登州
沙門島於萊州大洋入界河口舟行風信有
時自浙西至京師不旬日比二道尤便 通
惠河元郭守敬議開引昌平白浮村神仙泉
過雙塔榆河引一畝玉泉諸水進都城繞至
通州置閘以宣節之後漸淤廢嘉靖間御史
吳仲議修築立五閘置剥船六十每米一
石減陸輓費銀四分五厘歲省漕價十萬餘
兩 雷州直出海中有圍洲周廣七十餘里
內有八村專業採珠 各省土田惟貴州無

頃畝冊應辦糧差各於土官下總行認納

淮以北土無定畝以一望為頃欺隱田糧律條未之能行也江以南戶無實丁以系產為戶脫漏戶丁律條未之能守也蘇松常鎮

杭嘉湖東南財賦七府經界正而賦均惟湖為最圩無定畝賦逐戶開常之弊久矣官田糧重蘇為害不可勝言嘉之征邑各不同積儲殊寡於六府迥不迨焉在京各衙門俸

米出蘇常二府總約十萬餘石其白米儘派蘇州湖絲絕海內歸安為最次德清其次

嘉之崇德桐鄉杭之仁和此外取於四川保
寧又順慶之南充渠縣廣安蓬州亦次之而
山東次之河南又次之 應天太平寧國鎮
江廣德五府州以興王之地全蠲賦不征近
節議畝派勸米今至四升 杭州種族自南
渡時至者故多汴音鳳山門尤逼真以宋宮
殿在也 廣州無京解至不能自給官俸取
諸瓊州歲以萬計雷州無京解正德後并免
廉解廣西無京解軍餉取贍廣東及福建海
北之引塩湖廣之行糧南贛衡永之塩稅

天下運船凡一萬二千二百有奇原設廠淮安造者十九臨清造者十一近移臨清所造於淮安各順所便竊意山東總遮洋總當於臨清便江南上江總當於龍江關雲南土官非有沐府令牌不能調雖麗江每自大沐令至即虔納廣西左江兵不可用可調惟右江土官喜於見調兵人日米一升計價月可一錢俱為土官所得兵自齎糧且獻名倍役數以規糧給北人食腥臊夜目不明睡則沈熟可乘被虜者每竊馬以逃但為頭墩

哨夫所害以報功 中都無城有陵在故以
陵為城城可無設如得城則於陵守力踈又
以臨淮城輔之可援應。定海一潮下舟山
起陸八十里至沈家口出港十里許至烏家
口出蓮花洋半潮至普陀。自安吉獨松關
陸路至杭城元大軍取宋路。自杭由長興
之金竺關入南都為捷徑 朝鮮貢道自鴨
鶻關由遼陽經廣寧過前屯入山海關日本
貢道自定海關經浙省過蘇揚至淮安臨清
迂曲之行以示中華基勢 會通河元至正

二十六年開漕東南之粟罷海運始元漕至
濟寧舍舟陸行數百里入臨清衛河後由濟
寧開渠直抵臨清復於兗州城東築金口壩
竭泗水注濟寧以勝其高洪武二十四年河
決原武黑洋山漫過安山湖而會通河乃淤
永樂九年尚書宋禮濬通之十三年復罷海
運又用老人白英策築壩戴村社遏汶水東
入海令盡去南旺乃賴其利元亦曾引汶亦
借黃河為濟而近來患在於河一至而淤且
燻旱泉微反欲引黃河以濟此河引之至而

來之盛則又不能自勝其勢禹之順水之性
而今若以逆焉則此河之不可常恃雖有善
者不能必也近又有引沁之議 河東池益
成於南風地在中條山陰窪局蒸燠薰成激
蕩造化自然所結所患水少則池竭生硝水
多又氣澹難釀調攝之計又在人事故雨漫
而多或入北河濁水及東黑龍潭硝水皆大
害常濬姚暹渠以瀉五姓湖乃得 兵法聖
賢不漏之學心體全定則隨應普照所向無
不克。兵之制始於軒轅其道貴一曰一者

階於道幾於神故謂握奇蓋言一也以天地
風雲為四正龍虎鳥蛇為四奇正以出兵立
老營以為家奇以禦敵設陣勢以為戰風后
軒轅之臣乃司兵故謂風后握奇經正者所
常居握而運之其惟所餘之奇奇隨時應用
零出而不二故謂餘奇 李筌言曰兵猶水
水因地以制形兵因敵以制勝能與敵變化
取勝謂之神庸將以教習之法為戰敵之陣
不亦謬乎宋儒有不然其說蓋筌能言其意
所以輕迹古法云善用兵者教正不教奇

古名將李廣寧嬰祭遵李勣等皆極廉約不
私財故蓄惠不倦愛士能得其用這是世人
命根此處得則我之根培於御人得則人之
根益培根根相培造化日盛請諸鄉先生
立社會䟽切念志士不以出處易學仁者不
以人已異情達人不以遠近弛事壯心不以
老少改力豪傑不以雅俗貳念况今際明時
處善郡當無恙之身勵歸田之操而盛忘年
之風如我湖不少槩見者乎故倡不可無和
事不可獨成榷也晚昧深為是懼謀之棟塘

南荅二君二君曰約時結社寔予同心因屬
樞居府城道路之中先為舉事其事歲二會
在春秋二社日當事者給饌治具先期一日
到會所既會次日乃散會之所任當事之便
樞今八月十六日奉候於峴山浮碧亭風雨
無輟公私俱置衆寡不拘後先繹來出入任
意供具不華一取相觀之益一勿盍簪之疑
一溫知舊之情一申鄉曲之款一寄登臨之
興是會也止折簡不邀止長揖不拜止隱服
不冠止論說不譁止陶情不醉止盟神不禱

懇願俯臨共成雅集 辛酉湖滂歲大歉人

情涵涵衆問曰先生何以不向人道苦先生

曰古制三年耕有一年之積自己酉被荒迄

今豈得怨天尤人衆曰貧家每歲不穀用烏

能例古先生曰大則大用小則小用大有大

積小有小積古人量入以為出所以盈縮登

耗均停近多務繁文浪費只顧目下乃量出

以為入故一遭歉乏便涉狼狽 論春秋乃

性命之書春秋為賞罰之書非也無其位而

寄空文於榮辱之間烏乎得也謂褒善而貶

惡亦非也。聖人明道於天下而欲以虛名動之可乎？孔子之作春秋也，所以立教也不得行道於當時，慮後學之求其依歸而不可得也。而至理不容有言，則又難於先備。以為周行之示於世，是即易陰陽之化消長吉凶之實而假世象以章之，所以闡其玄以通之者。至矣。然猶慮夫中資之未能遽以曉也，乃復以當時行事之粗迹一折衷於性命精微之宜，使知道必協於中而人心本體之靈達於今古而不昧。是故春秋是非之書也，以別理欲。

而決王霸成治亂興衰之由者也大中至正
之矩無過不及之學損之而自生其情也替
之而自肆其情也委之而自過其明也紊之
而自罔其迪也故春秋與易通無顯微精粗
本末之判也 以上俱唐先生樞著

六

月到天心處風來水面時大丈夫不可無此
襟懷海濶從魚躍天空任鳥飛大丈夫不可
無此度量振衣千仞岡濯足萬里流大丈夫
不可無此氣槩珠藏澤自媚玉韞山含輝大

丈夫不可無此蘊藉 陽明先生曰有善無
惡者心之體有善有惡者意之動知善知惡
是良知為善去惡是格物

七

恭題

龍亭庫壁

本朝令甲在外文武諸司遇

萬壽元旦冬至及

太子千秋令節則陳 御座於中堂陳鹵簿

儀衛於兩階庀幄中設亭亭繞龍文飾以黃

金其中大書闕字以象

天子臨見群臣之座召稱為龍亭長官率其僚屬吏民望拜庭下升而祝降而蒿呼儀節視中朝無二直竣事之後令甲不著奉安之所以故諸司往往雜諸器物置之居積之庫而庫又率在堂之兩傍失居尊之體間有別建以崇之者蓋亦鮮矣隆慶己巳烏程李樂來令新塗行禮之餘喟然嘆曰君父之尊猶天也迺以其虛位置之堂側而眇眇臣子顧抗然居中以聽邑事仲尼過位之訓

少而誦之今安在哉邑之缺典莫斯為甚廼
相隙地建屋三楹其前為門繚以周垣扁曰
龍亭庫專為奉安 龍亭之所而幄帳鹵簿
從焉視 中朝所稱鑾駕庫者雖大小制殊
殆髣髴其意矣翼趨進而觀之曰此不可以
覘政乎世之居官者惟無敬 君之心故其
所臨之民 君之體也而不知惜所行之事
君之政也而不知供所司之法 君之令
也而不知守所掌之財 君之所需也而不
知節誣上行私壞法亂紀皆自一念之肆發

之耳今樂於君之虛位且知敬而尊之不
習於故常而特為之計如此固宜其令塗未
三載而善政種種莫非導君之惠以布之
民也他日位益隆代君之責益重亦惟無
忘此敬而已庫在邑治之內學士君子鮮造
焉而間有事其中類皆胥徒之賤翼懼其不
足以知此而例以建制之末視之也故特表
而著之庫創於樂筮仕之年十一月成於次
年之春正月其旁併收邑之圖籍以杜侵毀
亦式負版之餘意也

隆慶辛未十二月新淦縣儒學訓導姚翼題

八
新淦縣新修城隍廟記

古先聖人神道設教明有禮樂以維民生幽有鬼神以司民命冥顯雖殊而其佑世安民理則一也是故禦災捍患悉載於祀典坊庸表畷咸列於八蜡凡以其有功於民也而况壘上為城塹土為隍蕃庶所聚政教所出國以之藩民以之衛則其赫靈顯化受命於天造福於民有非常祀所可同者此城隍之神

所由起也。縣之有廟，則見於李陽冰《縉雲之記》。然止稱吳越有之，則唐制未達於天下也。宋歐陽修云：天下皆有，而縣則少。則宋制達於天下，而諸縣猶有缺也。我朝

太祖高皇帝洪武元年，加以封爵。府稱公，州稱侯，縣稱伯。三年，詔定百神之祀，皆革爵號。獨封城隍為鑒察司，民之神，郡邑建廟，視其公廳，以為高廣。有事於山川，則令食於壇，有事於厲祭，則主祭於中。令佐蒞政，先與神誓。朔望行香，次於先師。夫名山大川，萬古稱養。

民之功者也神則配其亨先師至聖萬古稱
教民之功者也神則同其敬令佐司教養之
任者兢兢然尊禮致肅豈非以神之保衛民
生教養所基而不可以或慢矣乎塗據豫章
上游當虔廣之衝為江省要邑則其高城深
池保障一方藩衛億兆丕著靈爽尤非他邑
所可同者廟在學宮之左歲久就圯祀禮不
稱隆慶己巳吳興李侯來令茲邑廉公節儉
凡諸稅羨紙贖及省約公費之餘則合僚屬
庭封之以葺百廢建尊經閣修練公祠創官

店立邑倉將修廟而廟適火侯曰此更新之
會也乃微而新之高廣如式宏麗過昔費出
於官而民不知廟成命邑人朱璉記之璉竊
惟城隍衛民而設者也其神則惠民而立者
也列代崇祀則以其有功於民 國家肇稱
則命以鑒察司民是廟其神者凡以為乎民
也不致力於民而能致敬於神者惑也侯之
盡心民事一芥不私百廢具修節民之費葺
神之宮遠得夫聖人神道設教之旨仰體乎
皇祖重民制祀之心是廟之新神必罔怨罔悞

吾意其風馬雲車而來駐斯宮城民固國而
永妥其靈矣乎古之事神者思其所依思其
所嗜城隍之神所司者惟民則其所依者亦
惟民所主者正直則其所嗜好者亦惟正直
侯於神所依者愛之神所好者得之其所以
克當神心者不但穹窿其棟宇焜煌其丹堊
而已故錫福下民者神之理也昭崇廟貌者
神之象也李侯得其理而因以新其象後人
瞻其象而可以思其理則侯之永庇於塗而
塗之徼靈於神者其與斯廟相為終始也哉

侯尊名樂字彥和別號臨川以戊辰進士高等筮仕董役則典史李汝秀及老人陳輔李夫敬等工始於己巳九月訖於庚午三月外設重門中為正堂前肯拜亭後有寢宮繚以周垣翼以兩廡齋宿有室庖省有所俱所當記者云

隆慶庚午孟秋邑人朱璉撰

九

新淦縣學新建尊經閣記

學校建尊經閣制也學校遍天下而尊經閣

不槩見非制也忘本始者弗修急簿書者緩
修畏勞費者忌修而泮藻不澤俎豆不飾又
未聞以課吏焉故為治急體要不隨時變化
之士或罕覲之噫勢也亦意也新淦學舊無
尊經閣隆慶二年郡理唐公舜欽視邑卜明
倫堂後創建之然棟宇僅立弗葺弗備再歲
不治當尋圯三年夏烏程李公領令至茹潔
懷芳節用愛人睹前政闕緒亟圖修之結重
屋列門窻二進計十間周繚石垣翼翼殖殖
與明制稱工始于五年十二月朔落成于六

年正月望乃蠲日率師生奉

國朝頒布經書秘而藏焉閣之下壇奕洞達便
諸生肄習其中一日因學博姚君翼徵松言
紀諸石拜手颺言曰

皇明列聖稽古右文秩官育材表章六經敷錫
之德意何殷盛也孔子曰畏天命畏大人畏
聖人之言夫大人莫尊於君父聖言莫大於
六經六經之言皆發揮天命引翼民彛之具
也世師弟子知所以尊天即知所以尊君父
矣知所以尊君父即知所以尊六經矣三代

之學所以明人倫也君臣父子夫婦長幼朋
友之道具在六經猶日星然多士誦法先生
躬行君子俾孝子忠臣真儒善治相待而成
所為賢有司敬君愛士之報豈渺小哉按郡
志載淦文獻世有哲人昭代在實錄者張太
史之出處以道練中丞之忠節不群胡司成
之文行振世陳司寇之耿介絕俗諸餘嗣興
之士咸彬彬焉有其文質蓋紫淦金川毓為
仁賢其陶鎔淬礪積漸章徹非偶然也詩曰
執柯伐柯其則不遠淦之士惟視其武熟趨

之耳矣侯為政廉不刻物仁不惠奸守官不
殉俗造士不先華雖更僕未易指陳松也得
夙通於紹介故睹記特詳如此且將告世之
學與仕者曰士君子欲為堯舜之佐周孔之
徒也察於三畏之旨斯可以語尊經矣侯名
樂字彥和臨川別號隆慶二年進士敦五倫
修三畏在任飭舊鼎新無限茲舉其一焉蓋
大且重者

隆慶壬申仲春新喻劉松汝貞拜撰

新淦縣重建便民倉碑記

天下事多敝於因循而成於明決世之言政者孰不曰居成者易創始者難事可以仍舊貫焉吾焉用改作為也嗟乎天下事將任其頽敝而不為之所耶此庸俗之見非所以論豪傑也夫國之設官以裕民也官之子民以體國也事有弗便於民而仰廚國計吾一任其頽敝而不為之所國與民將焉攸賴哉我國朝財賦取給東南江之西當三分之一淦為允糧者約三萬有奇舊有倉曰便民者在南

門之外以貯一歲之入而發運於江蓋其事甚便歲久圯壞當事者憚於興作每歲入則貯於舟歛發非時稽察靡悉於是已有侵耗之弊國課稍虧民大稱不便久未有所歲已已浙臨川李侯來蒞茲土既悉其弊則慨然曰茲有司事也顧舊基已圯且在門之外尤有未便視城中有基舊為藩司分署上官駐節不常司可無設請于當道以建新倉又慮工費無從乃捐在庫四差諸色暨歲派餘銀共計叁伯有奇鳩工計日不擾於民不愆於

素經始于隆慶四年九月落成于十二月計
為屋伍拾肆間而顏其廳曰體國裕民凡歲
之入時而貯時而發奸無所容歲課無損民
始大稱便走書屬震記之震憶昔在膠庠讀
書湄湘之上當歲運時見舸船鱗次洲渚擔
者負汗屬道舟人喧集有若漁獵所謂舊倉
者鞠于蓁莽則嘆其時未有以處之者茲三
十年矣邑非賢侯顧見有異同或猶未盡燭
其弊間有欲任其事又或憚於上議不憚工
費靡措則委而去之如傳舍取給一昔藉足

矣何則意見之未明而行之未決也侯治邑
僅二歲其他德政班班無論即此舉罔疑罔
滯積數十年所難者而一旦行之若無事然
此其才識若懸鑑以照毫髮無隱若神劍以
運千里不留上以體國垂經久之圖下以裕
民貽子惠之愛其視隨時遷就累歲月以博
華顯者可同日語哉今

國家軫念元元財賦為急侯且不日內召俾在
廊廟經理天下庶務了然一心運而行之無
不如意所向其裨於國與民益宏且深茲可

預卜矣夫破拘繫之見而成不世之業者豪
傑事也享無窮之利而頌之不敢諠者邑士
民分也震茲弗敢諉是用告于後之人其尚
念茲舉也時爾貢賦毋或後先慎爾出納毋
或耗損其有弊也循而葺之無廢墜也以仰
稱侯體固裕民至意茲舉也尚永永有賴哉
隆慶壬申二月刑部廣西司郎中邑人朱孟
震撰

十一

新淦縣新修養濟院記

嘗疑周禮憂民布德雖醫疴除飢煩恩之事
靡不曲至而獨恤養孤老經不專見然觀文
王治岐先四窮故可見古之聖人不忍於其
民之不獲也惻怛懇悃惓惓予辜或不暇任
人如此 我朝法古為政損益之天下郡州
縣治令各設養濟院籍民之孤老殘疾者宅
之寧宇時其衣糧生有養終有藏流惠九有
無窮已時誠

皇仁令典也郡縣百執事固多奉

主上德意間有高視闊步之夫旁睨不省大吏

過者或問而不察此所以王澤壅闕而實膏
鮮流也新淦養濟院舊在大南門外二里許
歲久屋頽令尹浙西臨川李公覽之感然掄
材鳩工昂構之凡四十間繚以周垣固密倍
昔一丁一食不妄勤罰作始于隆慶五年十
月訖工于六年正月成之日孤老扶藜蒲伏
漣涕如雷一日介書入喻道故且曰懼日月
久莫志也請記諸石松乃喟然嘆曰古聖人
之愛民也非臆其腹欲焉始與之也亦非臆
其腹惡焉始除之也即天地生物之心求其

所以生之者以左右民而已仁人君子得百里而君之其於鰥寡孤獨顛連無告之民使之饑食而寒衣朝暄而暮息脫天札沴癘之蓄者亦不過因天地生物之心以補造化之所窮以釋聖人之所病如斯而已於乎此李侯置院之工侯之心必然而不可已者也語曰一根百葉一實萬食言種善則生施德則勝也此室未作時侯嘗憂四窮月糧不繼也曲慮博計置官店於要歲取任金接濟給之闕白當道著為定式語詳文移碑中繇此言

之此室不作四窮蚤德侯矧此室又作完室
哉他日財成天地潤澤生靈即此方寸有餘
地矣侯在淦潔已信心無毫髮干鬻緣飾之
私法所欲鋤擊豪無避巨奸無暱近法所欲
循拊衆所棄必治衆所忽必理大要嗜古修
出流俗類此松羅溪野人也聞隣國之政欲
執簡而書之久矣斯役也謬辱之故不敢以
不腆辭侯名樂字彥和湖州烏程人隆慶二
年進士董役者老人陳輔其志與才皆能善
事侯心也得附書謹記

隆慶六年季春吉旦新喻劉松汝貞拜撰

十二

散筵 有仕歸田鞅鞅識者曉曰仕宦猶赴
飲也有酒數行主人意不在客醉而即止者
有午飲至晡醅醺而言歸者有秉燭盡漏醅
酌大醉而後已者總之無不散之筵也然酒
數行者賓主尚醒成禮而去至若酌酌者恐
為酒所使或有詈歐而散者矣不如蚤辭之
為愈也 剛折 老子之門人仕而請于老
子老子曰若剛則取禍不可焉門人曰君子

以剛為貴敢請所以老子曰夫齒剛而先缺
舌柔而存木之生也其條柔軟而枯槁也枝
則硬直故剛強者死之徒柔弱者生之徒也
尚嚴 馬之日就鞭羈者稍加之策則見
影而馳歷崎徑如越康莊矣其不習者脫卒
然加之彼必驚奔肆出則有泛駕而佚爾故
御民者不可一時弛法子產曰其次莫如猛
知言哉 不祥 子墨子見齊王曰今有刀
於此試之人頭倅然斷之可謂利乎王曰利
多試之人頭倅然斷之可謂利乎王曰利刀

則利矣孰將受其不祥王曰刀受其利試者
受其不祥曰然則戰孰受其不祥王思久之
曰我受其不祥遂止伐魯 防邪 郁離子

曰姦人之於人國家也一且不堪也而况慕
效之相承乎腐肉之致蠅蠅非特盡其肉而已
矣蠅生蛆而蛆復為蠅蠅蛆相生而不窮夫
何以當之是故君子之修慝辨惑如良醫之
治疾也鍼其膏肓絕其根源然後邪淫不生
救急 梁武帝城且圍亟矣尤聚講老子
臣有諫曰今有人焉適豆靜嘉肴核維旅方

執爵獻酬雍容于堂序之上而火起寢室則

將以為勾容乎抑滅火乎必以為且滅火也

君當是時何暇治老子為 浪傳 宋人曰

令一人汲水于里許已而家掘井自喜而語

人曰吾掘井似得一人里間遞相傳謂真井

中得一人也而聞之宋君君召而問之宋人

告以故君曰嗟夫傳言之誤若此宋人曰君

門寥遠指賢為不肖指不肖為賢皆類此也

宋君曰然 殘異 子車子之黻其色粹而

黑一產而三豚焉二則粹而黑一則駁而白

惡其弗類齒而殺之決裂其腎腸而後止其類於已者字之眴眴惟恐傷也淡玄子曰世貴同脫勿同即父子相噬若仇敵矣矧交手可畏也 輕敵 陳王涉以秦亂也有輕敵意博士曰臣梁人有陽由者其力扛鼎骨騰三 肉飛手搏蹙獸國人懼之一日嗔其妻左手建杖右手制頭而笞其背妻恚而撮其陰由竟仆地夫以勇夫而劣於女子手者輕於無備也 厚望 子華子曰齊之憔悴甚矣功曾不一二古之人而求治過之則何以裁窮

鄉下里其為叢祠也不過於卮酒鬻肉之操而已其所以請福者曰金玉滿堂大小康寧
斷齧足諸市利所扶持小所祝望者厚神其吐之矣獨醒士人有絜絜獨行而被黜
蓋甚不平也識者曰以子之行黜也固宜夫
群歎而醉翬一人避席去之衆必奮臂而呼
牽其裾惟恐後相與投轄巨觥而爭飲之令
酩酊而後已何則懼其獨醒也掩瑕夫
素絲之微類也染以為玄黃黼黻則可以薦
於朝廟白璧之微瑕也鑿以為珣璉敦彛則

可以享於神明大厦之腐棟以之齟而為椽
則不知其朽高崗之枯竹以之織而為籠則
不知其枯淡玄子曰世有卓犖之才以小過
而棄者悲夫 終迷 昔燕市有善酒者沉
湎終日夜已而病入肺臟去死無幾所親規
之曰病亟矣無已為糟邱之鬼乎其人大悟
始斷杯酌見酒輒推而去之曰毋溷迺公為
也未幾而唇焦枯鬱鬱無以遣乃自解曰
試小嘗之無傷也已而大爵如故遂不可藥
而死 極反 挫鋒子曰物極至則反火之

將燼也其焰必冲水之將竭也其流必駛木
之將敗也其實必繁鐘之將毀也其聲必震
故體將僵者先亟奔佚心將迷者先察錙銖
豚餌 語云貪夫死利哉衛人釣而得鰥
其大盈車子思子曰子何以得之曰吾始下
釣垂一魴之餌鰥遇而勿視也更以豚之半
肩則吞之矣故高爵重祿皆豚肩也世之不
為鰥者希矣 執迷 邾子以惡諫而亡奔
於道謂御曰吾以賢為人所攻御曰臣里鄙
人跨驢之市觀姜謂產於樹市者云土所產

鄙人弗信曰如若言當吾以驢予若否則若所售姜予我質之行道之人謂土所產也市者携驢而去鄙人張目曰即失驢然姜終樹產邾子大慚逢知田翁得寶玉於田所以示隣父隣父給為恠石歸置廡下是夜光照一室田翁家大怖以為真恠而速棄於野隣父無何盜之獻魏王立賜千金食上大夫祿為常夫寶一也勿知者棄之為恠物知者竊以受上賞然則賢才亦顧知與不知者爾修備 晉伐虞虞公曰吾享祀豐潔神必

據我無虞也宮之竒曰吳鄉人患蚊入市貨
藥驅之有道士黃冠者曰若持吾符歸而懸
之蚊即息踰於藥鄉人喜而聽之蚊如故也
謂道士謬已也往而執之道士與俱而察焉
曰否否吾之符懸在帷帳即驗子懸諸壁若
之何止今備不修而聽於神吾恐虞不祀矣
性習 虎豹之生文章未成而有食牛之
氣鴻鵠之生毛羽未傳而有翔霄之志性也
獼猴之舞應節鸚鵡之語若人齊女工於刺
繡襄女工於織錦習也 甘穢 昔蜚廉氏

有二馬一者朱躡白羸龍露鳳臆駛馳如無
終日不釋鞍竟以熱死一者重脰昂尾駝頭
貉膝踈齧善蹶奔而散諸野終年肥遁是以
鳳凰不憎山棲蛟龍不羞泥蟠君子不苟潔
以罹患聖人不避穢而養生 妄藥 夫無
病之人少有不和當靜攝自愈不可妄投以
藥石稍寒而投以熱則火熾熱而投以寒
則水洩水火相搏則元氣日起遂成沉疾而
難於救藥治國家亦猶是也弊不極不可以
輕變 反神 老子曰聰明即用必反之神

謂之大道故人之死也藏骸於野委其形于外也其祭也祀之于室存其神于中也知死可以知生矣 易濁 老子曰盆水若清之經日乃見眉睫濁之不過一撓即不能見方一圓也人之精神難清而易濁猶盆水也故曰勿撓勿撻萬物將自清勿駭勿驚萬物將自澄 大匠 楚王為臺材已具矣召群匠之良者而計之群匠咸環待於陛礪斷鋸持尺繩視其材而將斧也一匠獨無所持竊俯仰周視默然若有所思恍然似有所度衆皆目

而笑之楚王曰此大匠也卒用之而臺成混
沌子曰古之大臣不動聲色而奠我王家者
其此之流與 以上俱述贅劄廬州太守所
著原不書姓名